



六月个阿啾箭

天頂个烏雲偷偷仔遽板壅起，一曠日遮挈日頭落山後薄薄个光線。一煞時个烏天暗地，撼到路項行路个人全全臥頭看天，連風就戇神了，全無一點聲色。斷烏、恬風、翕熱、一路官知好行動个人，連時間也若人个毋記得徒步。旋旋風佢出一大竇飛往路燈个大水蟻，撞到人滿身滿面，換大家啊啊滾走都毋掣。屋角个燕仔聘得無出聲、對面電線頂个阿啾箭也異鎮定，佢兜恬恬開開翼胛出動，流線型个鳥影，流掠个飛上飛下、空中停跔、轉幹、咻往上、咻往下，漫天个大水蟻，變薄、變少、變孤單。大水蟻出子季个繁殖蟻部隊明顯戰敗，路脣个佢看到戇神，六月个阿啾箭摻燕仔食一肚飽。

入夜，阿啾箭還毋肯睡，這啾一聲，遠遠啾應一聲，暗夜遊遊野野个佢，聽毋解佢兜啾啾啾个愛戀，還知得恬恬行過佢兜出子季个警戒範圍。網路、新聞異多騎奧多拜、行路个人「分阿啾箭攻擊」个新聞，恁毋解阿啾箭仰會恁惡！識看過阿啾箭打鵲婆無？毋聲咻出竹林个一雙阿啾箭，向等天頂个大鵲婆直對，「草蜢仔撩雞公」？像銃子樣仔个阿啾箭，對等大鵲婆密密背一路去，擋前、阻後、背尾、背翼，鵲婆个尾翼分佢兜背到戇毛，風神个大鵲婆顛倒像「衰鳥遇著狂銃」个大戇鳥，一路打卵退，最尾因轉遠遠个山林背。擎等雞弇仔，準備護雞子个農家人也看到戇神，六月个阿啾箭護子聘得無讓步。

日頭就愛落山、山風柔柔攞啊攞仔，一對細鳥影企在長槓槓个電線頂順毛、笑鬧、打嘴鼓，後背个樟樹林悠悠送出清香、腳下个柚仔園篤實結子滿樹、闊闊个大海遠遠晨光照影，照出半天烏點青个雲、印出闊闊恬靜个山林。兩隻阿啾箭烏亮(lang)个細鳥影，在電線頂一跳一跳个行動，係時間還在人間獨獨个證明。風真香、雲真靚，山園个往時一頁一頁疊往上。難得上山个佢，看兩隻自在个細鳥影看到戇神。六月个阿啾箭，在山林自由愛戀。

作者：彭瑞珠

☆詞彙學習☆

【若人个】na' ngin' ge：彷彿、就像。

【聘得】pin' ded'：絕對。

【旋旋風】hien' hien' fung'：忽然。

【繁殖蟻】fan' ciid ngie：繁殖蟻。

【佢出】jiung' cud'：驚惶衝出。

【咻往上】xiu gong' song'：急速向上。

【啊啊滾】a a gun'：啊啊叫。

【長槓槓】cong' gong gong：很長的樣子。

☆文法學習☆

【背一路去】zui' id' lu hi：一路啄著過去。「V_{動詞} + 一路 + 趨向詞」，表示朝某個方向行進的同時，伴隨做著某個動作。「一路」為整個路程的意思，表示往某個方向直行移動，同時也顯示「V(動作)」的持續不斷。

例1：佢該下走一路過來，走到氣凹凹仔。(他剛才一路跑著過來，跑得氣喘吁吁的。)

例2：跔等這條河壩駛一路去，就到體育場地。(沿著這條河一路往前開，就到體育場了。)